

Sosiedade Sivil Husu Xefe Estadu Veta Proposta Alterasaun LAP-LFP



Estrutura FONGTIL no Prezidente Repúblika, Francisco Guterres Lú Olo, hasai foto hamutuk. Imajen Mídia PR

DILI, 8 agostu 2019 (TATOLI)—Sosiedade sivil kompostu hosi Fórum Organizaun Naun Governamental (FONGTIL) ho nia membru sira hala'o enkontru ho Prezidente Repúblika (PR), Francisco Guterres Lú Olo, iha Palásiu Prezidente Nicolau Lobato, Bairru Pité, kinta ne'e.

Objetivu hosi soru-mutu ne'e husu ba Prezidente Repúblika atu veta proposta alterasaun Lei Atividade Petrolíferu (LAP) no Lei Fundu Petrolíferu (LFP).

“Ami mai husu Prezidente Repúblika atu veta proposta alterasaun LAP Ho LFP,” hateten representante sosiedade sivil hosi ONG La'o Hamutuk, Celestino Gusmão ba jornalista sira.

Proposta veta ne'e bazeia ba razaun mak hanesan, diskusaun ne'ebé hala'o iha Parlamentu Nasionál no fatin saluk, seidauk bele konvense sosiedade sivil Kona-ba proposta alterasaun artigu 15 alínea a, ne'ebé Parlamentu ho governu aumenta iha LFP ne'ebé ko'alia kona-ba instrumentu no investimentu públiku privadu liuhusi Timor GAP.

Nia hatutan, ida ne'e sosiedade sivil seidauk hetan informasaun sufisiente atu bele fó apoiu ba governu no Parlamentu Nasionál (PN).

Sosiedade sivil hanoin no konsidera ida ne'e perigu tebes tanba prejudika Fundu Petrolíferu, ne'ebé ho nia objetivu atu sustenta jersaun ohin nian no aban bainrua.

“Ita imajina, se Fundu Petrolíferu iha tinan 10 oin mai hotu lalais, ita sei hakerek de'it iha istória kona-ba Fundu Petrolíferu, maibé jersaun oin mai sei la hetan,” tenik Celestino.

Razaun seluk, nia informa, bainhira Governu konsentra de'it ba iha área ka setór petrolífera, mak setór mal nutrisaun, edukasaun, saúde, bee-moos no saneamentu sei hakdasak. Aleinde ne'e, ema ki'ak sira sei kontinua hela ho difikuldade oioin.

Nia fó hanoin katak dala barak Governu ko'alia no fó sai katak setór petrolífera bele la'o no setór sira seluk mós bele la'o, maibé kestaun ne'e sosiedade sivil la simu no husu atu hili dalan ida ne'ebé sustentável liu.

“Ita-nia Fundu Petrolíferu hanesan fundu úniku ne'ebé atu sustenta ita-nia nasaun tomak. Razaun ida ne'e mak sosiedade sivil husu PR atu veta nune'e haruka ba fali Parlamentu Nasionál atu halo diskusaun kle'an liu-tan,” Celestino argumenta.

Jornalista: Cipriano Colo

Editór: Xisto Freitas

Tatoli, 8 August 2019

FONGTIL Husu Xefe Estadu atu Publika Tratadu FM



Enkontru entre estrutura FONGTIL no Prezidente Repúblika, Francisco Guterres Lú Olo. Imajen Mídia PR

DILI, 8 agostu 2019 (TATOLD)—Fórum Organizaçaun Naun Governamentál (FONGTIL) ho nia membru sira husu ba Prezidente Repúblika (PR), Francisco Guterres Lú Olo, atu públika Tratadu Fronteira Marítima (FM) ne'ebé Parlamentu Nasionál (PN) aprova ona.

Hafoin hasoru malu Ho xefe Estadu, Diretór Ezekutivu FONGTIL, Daniel Carmo da Silva, hateten, durante enkontru, hanesan sidadaun, sira fó hanoin ba Xefe Estadu atu bele publika ona tratadu ne'e iha Jornál Repúblika.

FONGTIL husu publikasaun ne'e tanba ida ne'e mak espasu no tempu ona ba luta naruk ne'ebé koletivamente povu TL halo no nia rezultadu asina ona iha marsu 2018, no Parlamentu Nasionál aprova ona.

Aleinde ne'e, sociedade sivíl husu mós ba PR atu haree didi'ak lei sira ne'ebé governu haruka ba Parlamentu Nasionál, liliu lei ne'ebé importante loos atu regula kona-ba operasaun petrolífera no mós Lei Fundu Petrolífera.

Kona-ba asuntu ne'e, Daniel haktuir, Prezidente Repúblika rona ema hotu nia preokupasaun, sujestaun ne'ebé lejítimu, pertinente no Prezidente rasik konsidera hanoin hirak ne'e la vinkula ninia desizaun.

Tanba ne'e, Daniel mós husu ba ema hotu atu respeita kualkér desizaun ne'ebé Prezidente Repúblika foti no hanesan sidadaun di'ak tenke kolabora.

Jornalista : Cipriano Colo

Editór: Xisto Freitas